

En la Tumleasta Dadora

■ En la preschentaziun da quest'emna visita il LIR ils abitadis situads en la Tumleasta Dadora. Da Giuvaulta maina il viadi a Tumeagl nua che la via ascenda la spunda per arrivar sin la terrassa da Tràn respectivamain sur Sched a Veulden.

Rothenbrunnen (Giuvaulta)

Vischnanca politica, circuit Tumleasta, district Rain Posterior (avant il 2001 Mantogna), situada lung la via da la vart dretga dal Rain Posterior, cun la curt da Ravetg. 1472 *Hof Juvalt*, 1572 *zum Roten Brunnen*, tudestg Rothenbrunnen (uffizial). 1803 64 abitants; 1900 77; 1950 247; 2000 332. Chats dal temp neolitic e dal temp roman. En il 12avel respectivamain 13avel tschientaner èn vegnids erigids ils chastels da Hoch- ed Innerjuvalt. Giuvaulta ha appartegnì a Tumeagl, suenter la reformaziun a la fin dal 16avel tschientaner ecclesiasticamain ad Almen. La baselgia reformada è vegnida erigida il 1741. Giuvaulta era in lieu da passadi a la ruta da transit dretga dal Rain. Il 1828 è vegnida construìda l'emprima punt sur il Rain ed a partir dal 1836 è succedida ina correzzion dal Rain. Il 1848 è la vischnanca da Giuvaulta sa separada da Tumeagl. Dal 1779 fin il 1851 è Giuvaulta stà in vischinadi dal cumìn d'Ortenstein-Val. Il 1896 è vegnida construìda la staziun da la Viafier retica ed il 1896–97 la via d'access a Giuvaulta. La funtauna da jod e da fier, che vegn menziunada gia da Johann Jakob Scheuchzer e ch'ha alimentà in bogn da cura fin il 1922, ha dà a la vischnanca il num tudestg. Il 1922 èn vegnidas realisadas la chasa d'attempads chantunala ed ina staziun externa da la clinica psichiatrica a Cazas, il 1935 respectivamain il 1961 la chasa d'uffants ed ina scola spziala cun dimora. La construcziun da l'autostrada (1983) ha effectuà ina meglieraziun generala dal fons. Part da la populaziun da lingua rumantscha: 2000 7,6% / 14,2% (meglra lingua / tuttas indicaziuns).

Jürg Simonett

Punt Arsitscha

Punt dal temp medieval en la vischnanca da Giuvaulta. La Punt Arsitscha maina sur l'aua da Veulden (Val da Pedra) a la sbuccada da quel en il Rain Posterior, en vischinanza da la curt da Ravetg (vischnanca da Razén). Il num deriva da «punt arsa». I n'è betg enconuscent cura e pertge ch'ella è vegnida incendiada. 1368 *pont Arsetza*, 1423 *Pont Arsitscha*. La localisaziun da la Punt Arsitscha tar la baselgia da S. Gieri a Razén n'è betg comprovada. En il temp medieval furnava ella in cunfin tranter il *Ministerium Curisimum* carolingic (pli tard *Cent Cuir*) e la *Tumillasca* (Tumleasta), alura tranter ils districts da chastellania ed ils signuradis feudals. Dapi il 15avel tschientaner separava la Punt Arsitscha las veglias corporaziuns da la Tumleasta/Mantogna e da Razén (brev da federaziun da la Tumleasta dal 1423), pli tard ils cumins ed ils vischinadis. Sur questa punt passava il traffic nord-sid da la vart dretga dal Rain.

Adolf Collenberg

Juvalta

Cun il num Juvalta vegnan designadas las ruinas da las fortizzas da Hochjuvalt ed Innerjuvalt, construìdas dals signurs von Juvalta en il territori da la vischnanca da Giuvaulta. *Hochjuvalt*: Situà sin in sparun grippus stretg e spundiv, era il chastè da Hochjuvalt (savens numnà faussamain Niederjuvalt) dividì en duas parts: l'areal da defensiun inferior cun la fortezza externa, situada a la riva dal Rain Posterior, e quel superior cun l'implant principal. Da quest ultim existan restanzas da la tur principal da tschintg plauns, d'in edificiu annex, dals foss e dal mir da tschinta. La zona d'entrada è per gronda part vegnida destruìda e la veglia via d'access è cuverta da glera. Da la fortezza externa è sa mantegnida sulettamain ina part dal mir, donnegià durant la



Il chastè d'Ortenstein, situà tranter Giuvaulta e Tumeagl.

construcziun da la via. Hochjuvalt è vegnì erigì probablmain en il 12avel tschientaner sco sedia dals signurs von Juvalta. En possess da l'uvestg da Cuir il 1352, è il chastè vegnì impegnà pliras giadas en il decurs dal 15avel tschientaner. Donnegià probablmain il 1451 en la Faida da Schons, è el vegnì bandunà enturn il 1500 ed è menziunà gia enturn il 1550 sco ruina.

Innerjuvalt: Situà sin in sparun grippus a l'ost da Giuvaulta, a l'entrada en la Tumleasta, era il chastè dad Innerjuvalt (savens numnà faussamain Oberjuvalt u Hochjuvalt) dividì en ina part superiura ed ina inferiura. En l'areal superior avevan ins erigì l'emprim (ca. 1250) ina residenza signurila a dus plauns, a la quala èn vegnids agiuntads pli tard la tur principal e l'edificiu d'abitat meridional. Ina cisterna ed in furn eran circumdads d'in mir da tschinta extern. En l'areal inferior sa chattavan ulteriurs edificis d'abitat e d'economia. Retschertgas archeologics (1980, 1982, 1990) han furnì indicaziuns impurtantas davart l'istorgia da las construcziuns ed han purtà a la glich pitschens chats da gronda valur. Erigì dals signurs von Juvalta probablmain enturn il 1250, è Innerjuvalt vegnì bandunà pauc suenter il 1500 ed era il 1550 gia en ruina.

Maria-Letizia Boscardin

Ortenstein

Chastè abità, situà sin in sparun sur il Rain Posterior en il territori da vischnanca da Tumeagl. Oriundamain in signuradi, alura in cumìn da las Trais Lias en la Tumleasta Dadora, cunfinà tras il Rain ed il Riedbach. 1309 *Ortenstein*. Il chastè è vegnì fundà en il segund quart dal 13avel tschientaner cun la construcziun da la tur principal. Il 1275 è passada la migiuria da Tumeagl sco feud episcopal als signurs de Vaz. Quella furnava, ensem cun la baselgia ed il chastè d'Ortenstein, la sedia dals vasals, il center da la suveranità territoriala da la Tumleasta Dadora. Il 1338 è il signuradi d'Ortenstein passà als conts de Werdenberg-Sargans (fin il 1509) ch'han renvià definitivamain las pretensiuns episcopals il 1472. Il chastè è vegnì destruì durant la Faida da Schons, el ha però pudì vegnir reconstruì il 1451 sin basa d'ina sentenza da cumpromiss. Il 1527 ha Ludwig Tschudi vendì il chastè d'Ortenstein cun tut ils dretgs signurils a Tumeagl ch'ha cedì quel a privats il 1528. Dapi alura ha appartegnì tut ils dretgs signurils al cumìn suveran d'Ortenstein cun ils set vischinadis da Tumeagl (lieu da cumìn), Pasqual, Dusch, Roten, Tràn, Sched e Veulden. Suenter la Reformaziun, introducida vers la fin dal 16avel tschientaner,

en Tumeagl e Pasqual sco era la gronda part da la vischnanca da Roten restadas fidaivlas a la veglia cretta. Il cumìn d'Ortenstein furnava, ensem cun quel da Farschno, la dretgira auta da la Tumleasta entaifer la Lia da la Chadè. L'Affar da Tumeagl dal 1766 ha manà il 1788 a las mesas dretgiras d'Ortenstein-Muntogna (Tràn, Sched, Veulden) e d'Ortenstein-Plaun. In'academia ed ina scola purila, planisadas ad Ortenstein il 1767 respectivamain en ils onns 1850, n'han betg pudì vegnir realisadas. Il chastè è vegnì transformà il 1720–40 e suenter il 1860. Las dretgiras d'Ortenstein e da Farschno èn integradas dapi il 1851 en il circuit da la Tumleasta, oriundamain da lingua rumantscha. Il chastè è oz en possess privat.

Jürg Simonett

Tumeagl/Tomils

Vischnanca politica, circuit Tumleasta, district Rain Posterior (fin il 2000 Mantogna), situada sin ina terrassa bassa a dretga dal Rain Posterior. 1943–2008 uffizial Tumeagl/Tomils. La nova vischnanca cumpiglia sco fracziuns tras fusiun a Tomils (uffizial) dapi il 2009 era las anteriurs vischnancas politicas da Sched, Tràn e Veulden. 1141 in *Tumillis*, enfin il 1943 uffizial Tomils. 1803 202 abitants; 1850 226; 1900 233; 1950 266; 2000 321. Chats dal temp da bronza e dal temp roman. La migiuria episcopala è ida il 1275 en feud als signurs de Vaz. Cun il chastè d'Ortenstein, sedia dals vasals erigida il 1250 (menziunà il 1309), furnava Tumeagl il center dal signuradi territorial da la Tumleasta Dadora. Il 1527 èn ils dretgs signurils vegnids vendids al cumìn d'Ortenstein ed al vischinadi da Tumeagl ch'ha fatg part da quel fin il 1851. Ecclesiasticamain ha Tumeagl appartegnì fin viaden il temp medieval tardiv a S. Luregn sper Pasqual. In emprim edificiu precursor da la baselgia da S. Mauritius, documentà il 1398 sco baselgia parochiala a l'ost da la vischnanca (oz en ruina), datescha dal 6avel u 7avel tschientaner, in segund dal temp carolingic. La baselgia parochiala, deditgada a l'Encurunaziun da Maria, è menziunada il 1474 (consecrada il 1486). Ina minorità reformada n'ha betg pudì sa mantegnair a Tumeagl. Il 1596 han las vischnancas da la Tumleasta Dadora effectuà la separaziun da lur territoris comunals respectiv. Las funtaunas da gudogn las pli impurtantas eran l'allevament da muvel, l'agricultura e la pumicultura. L'Affar da Tumeagl ha provocà il 1788 la divisiun dal cumìn d'Ortenstein en las mesas dretgiras dad Ortenstein-Mantogna ed Ortenstein-Val. Il 1848 è sa separada la vischnanca da Tumeagl da

quella da Giuvaulta. Il 1901–04 è vegnida construìda la via charrabla da Tumeagl a Veulden. Part da la populaziun da lingua rumantscha: 1880 87,3%; 1941 58,6%; 1980 16,1% (meglra lingua); 2000 4% / 13,1% (meglra lingua / tuttas indicaziuns).

Jürg Simonett

Trans (Tràn)

Anteriura vischnanca politica, circuit Tumleasta, district Rain Posterior. Fusiunada il 2009 ensem cun Sched, Tumeagl e Veulden a la vischnanca politica da Tumeagl. Vitg a mantun situà a 1473 m sin ina terrassa sin la spunda ost dal Rain Posterior. Ca. 1150 *Hof ad Tranne*, tudestg Trans (uffizial). 1803 84 abitants; 1850 104; 1900 56; 1950 61; 2000 69. Il bain attestà il 1208 furniva graun a la claustra da Curvalda. Ils da Tràn eran purs rumantschs, per part libers da vegl ennà. La baselgia, deditgada als ss. Pieder e Paul (menziunada il 1508), vegniva administrada davent dad Almen. Fin a la spariziun da la minorità catolica a l'entschatta dal 18avel tschientaner è Tràn stà confessionalmain en discordia (Affar da Tràn). Il 1527 ha la vischnanca cumprà ora ils dretgs feudals. Il 1596 han ils vitgs da la Tumleasta Dadora inizià la separaziun da lur territori da suveranità communal. Fin il 1851 è Tràn stà in vischinadi dal cumìn dad Ortenstein, a partir dal 1788 ha la vischnanca furnà cun Sched e Veulden il mez cumìn dad «Ortenstein Mantogna». Ils da Tràn vivan anc a l'entschatta dal 21avel tschientaner prevalentamain da l'allevament da muvel e da l'agricultura. Dal 1918–22 è vegnida construìda la via tras la val. L'incendi dal 1944 ha destruì ina gronda part dal vitg ch'è vegnida reconstruìda (numerus bains purils sparpagliads). L'arrundaziun dal terren ha gi lieu il 1945–47. Part da la populaziun da lingua rumantscha: 1880 70,9%; 1941 75%; 1980 37% (meglra lingua); 2000 8,7% / 11,6% (meglra lingua / tuttas indicaziuns).

Jürg Simonett

Scheid (Sched)

Anteriura vischnanca politica, circuit Tumleasta, district Rain Posterior (avant il 2001 Mantogna). Fusiunada il 2009 cun Veulden, Tràn e Tumeagl a la vischnanca politica da Tumeagl. Sched cumpiglia duas fracziuns serradas situadas aut sur la val sin la spunda dretga dal Rain Posterior: Sched (Unterscheid) e Purz (Oberscheid). 12avel tschientaner *de Side*, tudestg Scheid (uffizial). 1803 219 abitants; 1850 222; 1900 156; 1950 154; 2000 139. Ina curt a Sched appartegniva en il temp medieval tardiv als conts de Werdenberg, alura als Juvalts. Il

1527 ha la vischnanca cumprà ora ils dretgs feudals. Fin en l'emprima mesadad dal 16avel tschientaner ha Sched fatg part da la plaiv da Tumeagl. La baselgia da S. Simeon vegn menziunada per l'emprima giada il 1447. La reformaziun è vegnida introducida definitivamain suenter il 1600. Fin il 1654 ha constituì Sched ina plaiv cuminaiva cun Veulden. Il 1596 han las vischnancas da la Tumleasta Dadora separà lur guads e pastgiras. Fin il 1851 è Sched stà in vischinadi dal cumìn d'Ortenstein. A partir dal 1788 ha furnà la vischnanca cun Tràn e Veulden la mesa dretgira d'Ortenstein-Mantogna (tudestg Ortenstein im Berg). Il 1901–04 è vegnida construìda la via a Tumeagl. Las funtaunas d'entrada principals eran l'allevament da muvel e l'agricultura. Il 2005 offriva il sector primar 88% da las plazzas da lavur a Sched. Part da la populaziun da lingua rumantscha: 1941 92,4%; 1980 59,5% (meglra lingua); 2000: 19,4% / 31,6% (meglra lingua / tuttas indicaziuns). Il 2002 è vegnì substituì il rumantsch sco segunda lingua en scola primara tras il talian, e dapi il 2007 frequentan ils scolars da Sched la scola a Razén.

Jürg Simonett

Feldis (Veulden)

Anteriura vischnanca politica, circuit Tumleasta, district Rain Posterior. Fusiunada il 2009 a la vischnanca politica da Tumeagl. Vitg a mantun situà a 1469 m sin ina terrassa sin la spunda orientala da la Val dal Rain Posterior. 1290/98 *Felden*, tudestg Feldis (uffizial). 1803 156 abitants; 1850 164; 1900 130; 1950 176; 1980 107; 2000 129. Chat da munaidas romanas. In bain episcopal è menziunà a la fin dal 13avel tschientaner, ed en il 14avel tschientaner retiravan ils signurs da Rapertg la dieschma. Il 1527 ha la vischnanca cumprà ora ils dretgs signurils. Il num local rumantsch Veulden deriva, tenor Robert von Planta, dal patrun-baselgia Ipeult/Hippolytus (baselgia menziunada enturn il 1400). Reformaziun 1583. Il 1596 han las vischnancas da la Tumleasta Dadora cunfinà lur territoris comunals. L'incendi dal 1774 ha destruì Veulden quasi completamain. Fin il 1851 è stà Veulden in vischinadi dal cumìn d'Ortenstein, il 1788 è la vischnanca s'unida cun Tràn e Sched en l'atgna mesa dretgira d'Ortenstein-Mantogna. Ella è s'orientada fin viaden il 19avel tschientaner vers la Val dal Rain da Cuir (Domat). Ils sectors economics principals èn stads fin en il 20avel tschientaner l'allevament da muvel e l'agricultura complementara. La construcziun da la via en la Tumleasta (1901–04) ha pussibilità il svilup d'in modest turissem da stad. La pendiculara da Razén a Veulden è vegnida avverta il 1958 e renovada il 2006. La plipart dals letgs per esters vegnan mess a disposiziun en abitaziuns secundaras. Il 2005 lavuravan 62% da las persunas cun actività da gudogn a Veulden en il sector terziar. Il 2004 han furnà Sched e Veulden in consorzi da scola primara ed han substituì il rumantsch sco emprima lingua estra tras il talian. A partir dal 2007 frequentan ils scolars da Veulden la scola a Razén. Museum local da S. Ipeult, stgaffi e tgrà da Plasch Barandun. Part da la populaziun da lingua rumantscha: 1880 94,8%; 1941 72,7% (meglra lingua); 1990 25,4% / 40,2%; 2000 14,0% / 29,5% (meglra lingua / tuttas indicaziuns).

Jürg Simonett

Lexicon Istoric Retic

Il LIR cumpiglia bundant 3100 arttgels (geografics, tematics, arttgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: www.e-lir.ch; versiun stampada: www.casanova.ch u en mintga libreria.